

己未詞科錄

已未詞科錄卷六

通議大夫廣東提刑按察使司按察使無錫秦瀛輯

傳畧

五與試未用者九十七人

閻若璩字百詩號潛邱山西太原人徙居江南山陽諸生著有古文尚書疏證八卷毛朱詩說一卷四書釋地一卷四書釋地續一卷四書釋地又續二卷四書釋地三續二卷孟子生卒年月攷一卷潛邱劄記六卷困學紀聞注二十卷

古文尚書較今文多十六篇晉魏以來絕無師說故左氏所引杜預皆注曰逸書東晉之初其書始出乃

增多二十五篇初猶與今文竝立自陸德明據以作正義遂與伏生二十九篇混合爲一唐以來雖疑經惑古如劉知幾之流亦以尚書一家列之史通未言古文之僞自吳棫始有異議朱子亦稍稍疑之吳澄諸人本朱子之說相繼抉摘其僞益彰然亦未能條分縷析以抉其罅漏明梅鷟始參考諸書證其剽剗而見間較狹蒐采未周至若璩乃引經據古一一陳其矛盾之僞古文之僞乃大明所列一百二十八條毛奇齡作古文尚書冤詞百計相軋終不能以強辭奪正理則有據之言先立於不可敗也其書初成四

卷餘姚黃宗義序之其後四卷又所次第續成若璩
沒後傳寫供其第三卷其二卷第二十八條二十九
條三十條七卷第一百二條一百八條一百九條一
百十條八卷第一百二十二條至一百二十七條皆
有錄無書編次先後亦未歸條理蓋猶草創之本其
中偶爾未核者如據正義所載鄭元書序注謂馬鄭
所傳與孔傳篇目不符其說最確至謂馬鄭注本亡
於永嘉之亂則殊不然考二家之本隋志尚皆著錄
稱所注凡二十九篇經典釋文備引之亦止二十九
篇蓋去其無師說者十六篇止得二十九篇與伏生

數合非別有一本注孔氏書也若據誤以鄭逸者卽
爲所注之逸篇不免千慮之一失又史記漢書但有
安國上古文尚書之說竝無受詔作傳之事此僞本
鑿空之顯證亦辨僞本者至要之旨繁乃置而未言
亦稍疎略其他諸條之後往往衍及旁文動盈卷帙
蓋慮所著潛邱劄記或不傳故附見於此究爲支蔓
又前卷所論後卷往往自駁而不肯刪其前說雖仿
鄭元注禮先用魯詩後不追改之意於體例亦究屬
未安然反復釐剔以祛千古之大疑考證之學則固
未之或先矣

簡錄四庫書目古
文尚書疏證提要

是編因解四書者昧於地理往往致乖經義遂撰釋地一卷凡五十七條復摭所未盡爲釋地續一卷因牽連而及人名凡八十條復因地理人名而及物類訓詁典制得一百六十三條謂之又續其他解釋經義者又得一百二十六條謂之三續總以釋地爲名從其朔也大抵事必求其根柢言必求其依據有參互證多所貫通雖其中過執已意如以鄒君假館謂曹國爲復封以南蠻缺舌指許行爲永州人者亦間有之然四百二十一條之中可據者十之七八蓋若璩博極羣書又精於考證百年以來自顧炎武以外

罕能與之抗衡者觀是書與尚書古文疏證可以見
其大槩矣

節錄四庫書目
四書釋地提要

閻若璩太原人少奇慧博極羣書而句字必精核不
少苟尤嗜吟詩類張籍王建擬古樂府曉暢中義蘊
宏深山左趙秋谷嘗謂山陽閻百詩學問博洽前無
古人而若璩於王司寇唐賢三昧之選抉摘其舛謬
如東南御亭上之訛卸潯陽何處尋之訛潯胥爲訂
正不少假康熙戊午舉博學鴻詞久之卒子詠進士
官中書舍人若璩僑居淮安故秋谷稱山陽閻百詩

云

山西
通志

間若璩其先自太原徙山陽淹貫經史學博而思精
最長於考訂多闡先儒所未發著有尚書疏證四書
釋地困學紀聞注又同縣張弼字力臣篤學嗜古精
於六書一時耆碩皆推服之

江南通志

余避仇之淮安與淮之上下無不交聞君潛邱在其
中及應

制科來京師觀其所著書夥頤哉言洋洋乎乃不見
用而罷值徐司寇承

命修天下志書聘潛邱君掌其局多所論著取所爲
文讀之謂之曰吾不知於漢北海君相去何等若唐

之孔仲達宋之深寧叟則出之遠矣其學自竹木番
頁以迄金石甃甃浮圖櫺礎無不搜剔於天識其行
於地見其理於人自疏冗以還可得其容貌詞氣於
時日判其晷景於倫族無遠近必析其母妻子姓傳
婢厮養於篇帙備列其編摘分合字畫戈波之數子
雖非桓譚且見潛邱之能傳矣

節錄西河集

太原閻先生博學稽古網羅百代搜繹貫串語之詳
而擇之精近世號爲通儒者未能或之先也先生生
長世胄家多藏書幼卽潛心鑽研抉精剔髓思成一
家言所交盡海內名流如李太虛梁公狄杜子皇李

叔刺王于一魏冰叔昆弟時過淮必主其家輒留止
經年與先生討覈今古諸公皆歎服謂後來者居上
年二十餘遊長安名滿都下及返太原故里適顧寧
人處士亦客太原出所撰日知錄相示先生爲之補
遺校正處士無以易也嗣東海徐大司寇邀至京師
公家盛賓客獨首重先生凡著作必質之先生而後
定彙其傳是樓貯書埒天府先生皆能尋覽記誦與
公日夕參稽上下其議論竄後家居益孜孜於學所
相與往復辨論者則汪鈍翁朱竹垞爲多晚年撰述
益富四方從遊者日益衆商邱宋公榮開府吳門賓

禮授館相與質疑訂難無有虛日蓋先生之學之選
爲當代鉅公所推服者類如此

節錄沈
儼文集

賈崧按徵君自其祖礪礪觀察由太原徙居淮安
取爾雅晉有潛邱語以自號不忘本也觀察名世
科萬歷甲辰進士歷官寧台參政先高祖潛齊府
君師也府君領鄉薦後有寄閭礪礪師書載省隱
文集觀察艱於子仕閩時禱於九鯉河而生子修
齡修齡字再彭號牛叟卽徵君之父母丁名仙窈
字少姜能詩文自題讀書處曰兌閣以兌爲少女
已於女兄弟中行最幼也徵君少口吃資頗鈍讀

書至千百過未熟十五歲冬夜讀書有所疑沉思
堅坐心忽開朗自是穎悟異常子三貽樸元木訓
慤穀仲議畧方叔魏叔子閻氏三子字說云百詩
有子三人大父再彭君名之屬其友人魏叔子字
之貽樸後改名詠官內閣中書工篆刻著有印譜
王阮亭跋云左汾文章妙一世陳迦陵梓勤二十
序云右晉亦異才也左汾右晉貽樸訓慤自號云
田雯字綸霞一字紫綸又字子綸號漪亭一號山蘊晚
號蒙齋山東德州人康熙甲辰進士授秘書院中書舍
人歷官至鴻臚寺卿江蘇巡撫調貴州巡撫終戶部侍

郎著有古懽堂集三十六卷黔書二卷長河志籍攷十
卷山蘊詩選十五卷

當康熙中年王士禎負海內重名文士無不依附門
牆求假借其餘論惟雯與任邱龐塏不相辨難亦不
相結納塏叢碧山房集格律謹嚴而才地稍弱雯則
天姿高邁記誦亦博負其縱橫排界之氣欲以奇麗
駕士禎上故詩文皆組織繁富鍛鍊刻苦不冒規規
作常語趙執信作談龍錄嘗議其詩中無人然偏師
馳突終能自成一隊談藝者弗能廢也附載黔書二
卷爲貴州巡撫時作又長河志籍攷十卷德州古廣

川地隋書避煬帝諱改長河也王士禎居易錄嘗稱
黔書篇不一格有似考工記者似公穀檀弓者似越
絕書者如觀偃師化人之戲然與長河志籍攷實皆
祖郭憲洞冥記王嘉拾遺記之體是亦好奇之一證
存備文章之別格云爾

節錄四庫書目
古權堂集提要

公由鴻臚寺卿巡撫江蘇急民之隱入告諸疏如漕
白米色采買顏料挑濬京口河道酌減練湖田價停
止蘆課辦銅皆鑿鑿有利益於百姓而不爲空言未
幾調貴州招接土番蠻王世爵土總兵龍天祐誅川
蠻阿所率談笑指揮採取如囊中物暇則葺學舍購

書籍以教黔之士子風俗大和相率肖公象奉祀陽
明書院公所著山蘊分體詩選十五卷古懽堂文集
二十二卷黔書二卷長河志籍攷十卷皆一生經濟
所寄公性不喜隨俗俯仰聽其言凌厲矯拔粹然卒
歸於正引拔後進惟恐不及學者誦習公之詩若文
與新城王阮亭先生並兩先生皆山左人故以地名
別之

節錄周銘彙
撰神道碑

公性好山蘊官京師時得之寓居牆下因作移居詩
一章有牆脚山蘊之句京師傳誦其語謂之田山蘊
而公亦自號山蘊子罷官家居構山蘊書屋僅三楹

無丹雘刻桷林木泉石奇偉之觀然天下士大夫南
北行道濟南者必謁公求山蘊觀之蓋以公之詩也
節錄惠周惕
硯溪文集

子綸中丞作黔書凡七十六篇篇不一格其記苗蠻
種類記水西烏蒙馬記革器記硃砂水銀雄黃凱里
鉛菡醬叩竹諸篇有似爾雅者似考工記者似公穀
檀弓者似越絕書者讀之如觀化人之戲故相國孫
文定公泚亭作顏山雜記記山蠶琉璃密器煤井鐵
冶等文筆奇峭亦如此

居易錄

先生學博才贍所爲詩如萬斛之泉隨地湧出不擇

細流早與十子並驅晚年諸子凋零獨爲海內所宗
汪鈍翁先生序其詩謂與漁洋相頡頏王先生之詩
其詞雋逸其旨清婉而和平田先生尤縱橫跌宕可
喜舉凡隨物寫形緣情叙事無不頓挫開闔各臻其
勝閒一出奇則如夏雲之突兀怪松之礪礪未易名
狀所謂橫空硬語妥帖排奐者惟先生有之非虛譽
也

山左詩
鈔跋

德州田山蘊讀書掇拾字句有餽飭之目嘗云奇字
古人所常用於古詩爲尤宜班馬等賦所以令人崑
眼傾耳者政由時出奇字襯帖之方今文尚古吾黨

之士獨不訪子雲之亭薰班馬之香乎予友季柳亭
云山薑告歸臥病牀第醫以方進惡藥俗不飲易以
他名乃喜如以枸杞爲天精人參爲地精木香爲東
華童子其癖好新奇老而愈怪柳亭卽山薑女孫壻
也

茶餘
客話

漪亭晚在黟別自署蒙齋猶之元次山官道州呼漫
郎客樊上稱輦叟也由進士除秘書院中書舍人中
書號丞相掾在昔以貲郎供職至是有御史言機務
重地宜用進士參是選始闢此徑然朝士率以異途
目之諸翰林素貴尤偃蹇不爲禮其同官某詩云短

氣平生惟寫字傷心此日是求官可爲參獻太息者

也久之調農曹遷水部膺鴻博薦已而被落

飾錄詩鈔小傳

瀛按先生族諸生舍人基嘗貽余古懽堂全集其詩與漁洋山人標格不同而才氣卓犖可傳桐鄉馮編修集梧得先生秋泛圖卷子屬余題後卷中名人題詠甚富勝流韻事猶可想見

賈崧按司農之先本常山人上世諱晚者始徙德州父緒宗進士官浙江麗水知縣弟需翰林編修司農出督河工以病歸壬午

聖祖幸德州

賜寒綠堂額王述庵先生題秋泛圖詩云座中裙屐何人斯緯蕭之客來西陂或似小長蘆釣師酒酣跌蕩無不有捉筆快寫瓊瑤辭先生獨爲民力慮想見感激淒心脾忿忿彈指百餘載粉墨未駢神扶持

嵇永福字爾遐號漪園江南無錫人順治乙未進士授浙江嚴州府推官左遷山東歷城縣縣丞著有漪園遺藁

瀛校先生與新城王文簡及先宮諭皆順治乙未同年進士先宮諭罷翰林歸應蔡大將軍毓榮之

聘先生亦同時從軍荆襄文簡贈行兼寄先宮論
及李岷瞻詩云帕首鞞刀氣不羣秀才今復學從
軍也知好句輸中散惟有相思寄楚雲秦子清真
五字詩李生磊落萬人姿他年幕府論功日七寶
莊嚴合是誰先生膺薦過山左聞母病欲告歸不
獲有述懷詩六首赴京與試報罷

吳雯字天章號蓮洋遼陽人父允升官蒲州學正遂著
籍蒲州諸生著有蓮洋詩鈔十卷別本蓮洋集二十卷
天章本遼陽人順治六年其父允升任蒲州學正卒
於官雯兄弟孤弱不能歸遂寄籍於蒲州康熙己未

薦舉博學鴻詞不中選其卒也刑部尚書王士禎爲
志墓稱初見其詩有泉繞漢祠外雪明秦樹根濃雲
溼西嶺春泥沾條桑至今堯峯上猶見堯時日諸句
吟諷不絕於口所作居易錄中又亟稱雯西城別墅
諸篇趙執信懷舊詩序亦稱雯拙於時藝困躓場屋
體貌麤醜衣冠垢敝或經歲不盥浴人咸笑之然詩
才特超妙其詩一刻於吳中再刻於都下三刻於津
門後士禎爲刪定存千餘首亦見墓志中因雯沒之
後未及刊行故懷舊詩序曰蓮洋卒後阮翁爲作墓
志且刪定其集迄今將二十年未行於世意其時阮

翁毫而多忘未幾遂亡未及歸諸吳氏也池北書庫
散失殆盡蓮洋集從可知矣云云然其集實已歸吳
氏乾隆辛未汾陽劉組曾哀其全彙刻之人以士禎
所評者別刊一小冊竝行越十三年甲申蒲州府同
知山東孫謬始從雯姪敦厚得士禎所定原本簡汰
重刊詳載士禎之評併以劉本所遺者補刻於後以
所見墨跡補之其士禎所刪而劉本誤刻者咸爲汰
去凡得古詩二卷近體五卷補遺一卷詩餘一卷文
一卷冠以墓志而附以同時唱和題詠之作卽此本
也雯天才雄駿其詩有其鄉人元好問之遺風惟熟

於梵典好拉雜堆砌釋氏故實是其所短劉本無所
別擇頗傷冗濫此本沿新城之派又以神韻婉約爲
宗一切激昂沈著之作多見屏斥反似鄰於清弱亦
不足盡其所長然終較劉本爲簡潔故置彼錄此

節錄

四庫書目蓮
洋書鈔提要

雯蓮洋集已著錄案王士禎作雯墓志稱其詩一刻
於吳再刻於都下三刻於津門今皆未見趙執信懷
舊詩序稱雯以遺藁付王士禎雯歿後將二十年其
集未出疑士禎耄而忘之又稱池北藏書散失殆盡
是集可知則雯之原藁似乎散佚近時乃疊出三本

一爲臨汾劉組曾所刻一爲山東孫襄所刻一卽此
本爲浮山張體乾所刻劉本稱得自士禎門人黃叔
琳家孫本及此本并稱得自雯姪秉厚家皆以士禎
評點相誇孫本竝考核評語之同異此本更較量圈
點之真僞考第七卷中留別車仝詩載士禎評曰今
車仝果領解中州此亦識也惜天章不及見耳的爲
雯沒後之語則士禎所定或歸諸吳氏亦未可知也
然士禎諸說部中所品題獎借者幾於指不勝屈今
其集率久覆醬甌無人重其姓名而雯詩獨數刻而
未已是知雯詩足以自傳不以士禎始重也刻雯集

者反若借士禎以傳雯然則使雯不及識士禎卽謂
雯詩不工乎三本之中劉本詳備於孫本此本又詳
備於劉本要之詩之工拙不係篇帙之多少今繕孫
本入秘閣而此本則存其目焉

四庫書目別本
蓮洋集提要

吳雯字天章性至孝事母暨祖祖母胥安其養鍵戶
讀書久之於經史秦漢暨唐宋元明諸作者源流同
異悉能確指其故不屑爲帖括家言戊午舉博學鴻
詞臨朐馮相國新城王司寇讀其所作詩文大加賞
歎晚年築室王官谷口家日貧詩日工著蓮洋集若

千卷行於世

山西
通志

吳生天章名雯子同年臨穎君之子蒲州諸生家永
樂讀書奉母苦貧數數出遊有詩數百篇古澹閑肆
得古作者精意而自成一家之言昔在丁戊閒生來
京師予肱其篋得蠹簡數十番讀而駭歎謂非流俗
所應有以示劉吏部汪戶部梁侍御其駭歎復不減
予今十餘年矣比生再入京師予復肱其篋則其詩
雷碾劃豁又過於昔予讀之河傾燈灺不知止惜乎
三君子不在不獲與之矜賞如曩時也

居易錄

徵君詩清挺生新趙秋谷官贊謂千頃之陂不可清
濁天姿國色麤服亂頭亦佳恰稱其詩之分量

國朝詩

別裁
集注

瀛按先生父初名允升既登第改名來亨以順治
二年舉順天鄉試逾五年選蒲州學正又五年成
進士其明年授臨潁令已前沒事具堯峰所作墓
志堯峰蓋與允升乙未同年生也余家藏先生蓮
洋集蓋太谷徐比部昆刻之京師者詩甚潔淨殆
非刻本冗濫之舊

楊還吉字六謙山東卽墨人貢生著有味道樓集

楊生志潔而行芳才茂而年盛其鄉皆稱之而不肯
就童子試縣令張君琛折柬召之彊而後出余爲補

諸生

節錄施閏章
學餘堂文集

馮雲驤字訥生山西振武衛人方伯如京子順治乙未
進士授大同府教授遷國子監博士累擢戶部郎中出
爲四川提學僉事

馮雲驤方伯如京子順治乙未進士授大同教授遷
國子監博士再遷戶部主事員外郎轉郎中出爲四
川提學僉事雲驤籍華貫不習爲純穉態奮跡詩書
以早年決科第而勤修職業不靳躡進所至以廉明
著尚書魏環極嘗言訥生見識高議論正稱爲畏友
先是任學博時與雲中徐化溥遊梓其集行於世環

極尤亟稱之弟雲驢丙辰進士官至禮科給事中

山西

通志

畢振姬字亮四號王孫又號頡雲山西高平人崇禎壬午解元順治丙戌進士授平陽教授遷國子監助教轉刑部主事尋遷員外郎中出爲濟南道參議金衢道左參政廣西按察使湖廣布政使著有尚書注西河遺教西北文集四川文獻摘鈔山川別誌

其文頗縱橫有奇氣然劍拔弩張之狀亦覺太甚其云西北文者太原傅山所題以東南之人謂之西北之文也元好問中州集題詞有曰鄴下曹劉氣儘豪

江東諸謝韻尤高若從華實評詩品未便吳儂得錦袍傅山所題蓋猶是意然文章公器何限方隅韓柳皆非南人歐曾亦非北士門戶相誇總拘墟之見耳

節錄四庫書目
西北文集提要

畢振姬讀書五行並下師事山東王漢河南李政修
中前壬午鄉試第一

國朝順治丙戌成進士初授平陽教授入爲國子監助教遷刑部主事歷員外郎郎中公餘坐臥黃埃黑竈瓦鐙布被伏案讀書時稱爲有官僧癸巳

世祖章皇帝廉內外大小吏

特簡分守濟南參議道時歲旱盜王顯張甚流民盤踞峒嵯振姬日夜馳三百里安插七千口有奇供軍需數十萬泰山香稅羨餘歲給公使費至是充餉七千遷廣東水使三藩四院使如織立約束無派無折減船減夫六七千有奇又遷金衢道左參政尋擢廣西按察使殫力梳爬平反參挾兌等大獄七十餘獲玉璽將軍印纍纍海峒宿患胥平經畧洪承疇奇其才題陞湖廣布政使辭不應振姬莅官往返胥一僕一馬食無兼味身無更代衣三娶無衣帛之妾所至率曉夜力學以爲常里居置祭田義田役田戴笠耕

薊暇輒指授後學有師法戊午劉司寇健魏司憲象
樞舉博學鴻詞以老病辭歸卒年六十有九著尚書
注西河遺教四川文獻三川別誌藏於家爲文主春
秋內外傳而奧古堅鬱得之管子爲多

山西通志

畢振姬山西人由進士順治十四年歷任廣東按察
司僉事廉潔明敏剛正公平民呼爲畢青天任滿遷
轉不攜羊城一物人思其德

廣東通志

康熙間山東多詩人山西多名宦陳午亭相國嘗作
六公贊序畧曰吾鄉多賢人君子其以清德著者若
曲沃衛文清周祚陽城故刑部尚書白允謙蔚州魏

敏果象樞永寧于清端成龍陽城故巡撫張椿高平
故布政使畢振姬六公生同時在數百里之內所謂
天下之十也而吾欲從之遊於是作六公贊云魏敏
果擢總憲首疏申明憲綱舉侍郎以下有清望者九
人畢振姬陸隴其亦與焉後皆擢用予謂顏雲先生
之品望風烈當亦湯文正公之亞也

茶餘
客話

顧鼎銓字逢伯榜姓張浙江仁和人順治甲午順天舉
人除山西蒲城縣知縣

顧鼎銓仁和人順治甲午舉人知山西蒲城縣兵燹
之後百計招徠民皆復業歲旱鑿石爲渠以資灌溉

又廉得巨猾爲閭里之害者置之法民受其惠子祖

榮官內閣學士

浙江通志

葉封字井叔號慕廬晚號退翁浙江嘉興人湖北黃岡籍順治己亥進士除延平府推官改登封縣知縣遷西城兵馬司指揮擢工部虞衡司主事著有慕廬詩集嵩游草嵩山志嵩陽石刻集記

是編乃康熙癸丑封官登封知縣時作也登封地在嵩山南故其所錄碑刻以嵩陽爲名考此書初出之時顧炎武潘耒皆嘗議之炎武之言曰開母廟石闕銘重日二字出楚辭遠遊篇所謂言之不足而長言

之也并叔堅以爲重日而言是年月一行案此一行
今有六字二年之下重日之上空石未鐫益明其非
紀日矣未之言曰大安二年後魏中嶽廟碑今在登
封縣天寶十四載少林寺還天王師子記今在少林
寺并叔石刻集記不知何以遺此其說誠然然炎武
金石文字記採此記者不一而足而景日昃說嵩金
石類亦全用此記古今金石之書其備載全文者在
宋惟洪适之隸釋隸續在明惟陶宗儀之古刻叢鈔
朱珪之名蹟錄都穆之金薤琳琅在

國朝惟顧炎武之求古錄陳奕禧之金石遺文錄葉

萬之續金石錄其餘不過題跋而已此書錄取碑文
便於參考漢嵩山大室神闕銘開母廟石闕銘少室
神道石闕銘以及唐之則天封祀壇碑夏日遊石淙
詩歐陽趙洪皆失載而此記能收之洪書但載漢魏
歐趙二錄僅迄五代此書載及宋金元明東魏嵩陽
寺碑文東譌東矩譌短馴譌巡苑譌苑洋譌庠此書
能是正之王士禎蠶尾集有封墓誌稱其精爾雅文
訓詁工於篆隸又稱其手輯嵩志二十一卷復旁求
漢唐以來碑版文字別爲石刻集記二卷辨證精博
人比之劉原父薛尚功則當時亦重其書矣

備錄四庫書目

嵩陽石刻
集記提要

指揮號俗吏清流率聽爲之君一以清靜爲治與其
僚莆田林堯英唱和贈侍田公雯都憲宋公榮前祭
酒曹君禾給事王君又旦吏部顏公光敏輩相與推
挽風雅大興戊午舉鴻博報罷及授工部主事君已
前歿年止六十有五

節錄漁洋
文集墓志

黃州葉井叔家武昌之樊湖以漁釣自娛長嘯賦詩
翛然自適旣官登封數載詩益清深雅健纚纚可誦
比來京師予獨取其嵩山諸詩別次爲集而序之曰
從來曠達之士寄託山水以抒寫其志意或一邱一

壑工於刻畫形似及與語五嶽之遊非有絕人之才
鮮不爲名山大川之所奪此古今之通患也嵩高位
天地之中居五嶽之首自禹貢大雅載記而後代有
作者若井叔之工而且富吾見亦罕矣此非具絕人
之才不能也

節錄王士禎
蠶尾文集

武昌舉人葉道復以其父工部主事井叔遺詩來井
叔本嘉興人寓黃州順治己亥進士篤實君子也其
族弟文敏公介於予以詩來質予盡刪其舊作獨取
其嵩山詩五六十篇爲嵩遊集序而刻之又選其已
未庚申詩刻之列其詩於十子中康熙己未以博學

鴻詞徵罷歸及銓授虞衡司主事并叔已前卒年六十餘矣并叔精爾雅說文所輯嵩山志嵩山石刻集記皆可傳

居易錄

葉封字并叔黃州人順治己亥進士官刑部曹郎與王黃湄謝方山輩結進士十才子社悉擯諸詞館臺閣名流且與新城王貽上分幟一時憚其鋒詩號慕

廬集

節錄楚詩紀小傳

賈崧按工部本王姓其父長青字錦林後於中表葉翁始氏葉崇禎末錦林自高要丞遷黃州衛經歷舉宸遷永明縣令未赴殉節

陳玉璫字賡明號椒峯江南武進人康熙丁未進士授
內閣中書舍人著有學文堂集四十三卷

是集雜文三十一卷詩八卷詞四卷其說經之文及
辨議諸作亦頗有源委不同勦說然大致逶迤平行
學宋格而未成詩則更非所長矣

節錄四庫書目
學文堂集提要

此本凡文四十三卷詩十卷詞三卷總五十六卷然
文集之中有錄無書者九卷實爲四十七卷與前一
本大同小異然兩本皆無總目疑皆隨作隨刊之本
非其全帙也王暉今世說稱玉璫每讀書至夜分兩
眸欲合如綫輒用艾灼臂久之成痂蓋亦苦學之士

又稱其所爲詩文旬日之閒動至盈尺見者遜其俊才則貪多務博可知宜其集不一本也

節錄四庫書目別本學文

堂集提要

椒峯少有大志凡天文地志兵刑禮樂河渠賦役諸大事莫不講求爛熟言之娓娓賓客輻輳應酬有午以至彈琴投壺嬉戲之樂靡所不爲偶有觸發爲詩文旬日之間動至盈尺見者遜其才比於劉穆之云

今世說

瀛按先生家太湖之馬蹟山卽夫椒山故以椒峯自號與邵青門交善所居有畧圖青門用少陵游

何將軍山林韻十首寄題嘗修常州府志人推善本

賈崧按舍人與迦陵檢討爲兄弟行舍人家有園
檢討嘗讀書其中舍人在興濟有寄懷家兄其年
句云一自風濤愁裏聽真憐兄弟別時難

陳僖字藹公直隸清苑人拔貢生著有燕山草堂集

門人陳藹公以古文名河北有燕山草堂集若干卷
來京師弔真定梁公示余上谷殉節紀事敘述甲申
流賊之變邵同知宗元張光祿羅彥金御史毓峒諸
公事蹟甚得太史公筆

居易錄

孫槃字曙東浙江嘉善人崇禎己卯舉人除江南亳州知州調開州知州擢吏部郎中

曙東性穎異頗究心天文河渠由孝廉授亳州牧時經兵燹勞來安集墾田萬餘建巨橋十一以當蒞蕩之衝轉開州積穀三千以備荒歉墾田七十頃飛蝗入境盡力掩捕不爲患人比之中年三異後擢吏部

郎中

李遇孫鶴徵錄續補

李念慈字岷瞻號劬庵一名念茲陝西涇陽人順治戊戌進士授河間府推官改補廉州府推官裁缺改授山東新城縣知縣緣事罷歸後從軍荆襄以運餉功再授

天門縣知縣調景陵縣知縣若有過嶺吟谷口山房詩
集十卷

其詩吐屬渾雅無秦人亢厲之氣是集皆其未第以
前所作故歡愉之詞少而愁苦之音多其題曰谷口
山房者史稱池陽谷口在涇陽西北四十里爲念慈
舊廬所在故以名其集云

節錄四庫書目谷口山房詩集提要

秦人詩自李空同文太青皆有車鄰駟鐵之遺聲此
瞻行安節和一唱三歎有蒹葭白露美人一方旨意
蘆花蔡大將軍之討吳逆也先生與先宮諭同在

幕府出入必偕軍中唱和之什甚多並見於然竹
集先生之先南京吏部尚書世達謚敏肅隆萬間
名臣父紹允之喪先宮諭爲表其墓而堯峯銘之
先宮諭嘗稱先生詩古文雄深瑋麗同被

召而先生不遇竟以縣令終

吳農祥字慶百號星叟浙江錢塘人諸生前明中允太
沖子著有宣齋南歸雪鴻等詩集一百三十四卷古文
一百四十卷駢體文四十卷詩餘二十四卷蕭臺集二
百四十卷梧園雜著二十卷流鉛集四十卷輿圖隸史
彙攷錢邑志林補錄文獻通攷嘯臺讀史錄唐詩辨疑

詞苑等書

吳農祥字慶百宮允太沖長子少異敏一覽成誦家有賜書鍵戶伏讀茹經涵史馳騁百家康熙戊午以博學鴻詞薦歸而著書自娛詩不下萬餘首爲文條貫五經尤精於易與蕭山毛奇齡友善然質疑送難不肯苟同所著有蕭臺集二百四十卷梧園雜志二十卷流鉛集四十卷詩餘二十四卷

浙江通志

瀛按先生熟於明季掌故甲申以後浙東西殉節及有名諸生皆爲之傳志余在杭州從它氏借鈔其本寶而藏之而梨洲黃氏輒疵其記載失實卽

如張忠烈蒼水尚書一人本末而梨洲及先生所撰述與全吉士鮎鯨亭集中神道碑互有同異何歟

賈崧按星叟以大司空陳鼐永薦試卷在中中已而不與

聖祖顧大學士舉所遺首以星叟薦又不與或曰索其卷無有故罷李文襄之芳聘入幕甚重之年七十七卒星叟兒時卽爲馬文忠公世奇所知嘗於婦翁陳傅巖座試芙蓉露下落賦時在末座一揮而成末綴以詩結句云一輩少年爭跋扈明公

從此願躬耕陳公歎爲英異

張瑞徵字華平山東萊陽人順治壬辰進士改庶吉士授編修歷宮允外遷河南汝南道副使

汝南水旱頻仍荆榛滿路先生下車卽修城垣捐資

賑濟漸有生聚之謀其折獄明敏能辨冤晰枉光州

賊襲商城會勦擒戮先生之力居多

李富孫鶴徵錄續補

許先甲字彛千一名先聲浙江仁和人廩監生授桐鄉縣訓導

許彛千是許勉無子勉無讀書竟夜不輟許每臥聽

父讀書旦輒默誦父嘆曰兒臥時乃過我醒時

今世說

曩千司訓桐鄉時值盜警城無守禦邑令惶怖曰是
可先聲奪之命邑中火炬齊發金鼓震撼盜以有備
駭去邑令歎曰公此舉雖古曳柴增炬剪楮削木何
以過是

同上

趙進美字嶷叔一字韞退號清止山東益都人前明參
議振業子崇禎庚辰進士順治初起太常博士歷官至
福建按察使有清止閣集

公庚辰榜下譽籍甚與萊陽姜如須宋荔裳桐城方
密之華亭陳臥子李舒章宋轅文輩以詩名雄視南
北甲申之變僑居金陵與荔裳避地吳閭嘉禾

皇清定鼎補太常博士在京師時才名甚盛而守之以謙外和內介不苟異同故仕惟平進位不卿宰而亦鮮患禍早歲服官特優文譽及在西江乃以兵畧自見關西河北無赫赫之名去後嘗見思初公童年爲詩頗好華艷登第後師友漸摩遂踐信陽歷下之

庭

備錄趙執信因園集

公少爲詩清真絕俗得王孟之趣使江西時尤刻意二謝其放吟一卷皆樂府詩丁明末造多悲天閔人之思顧盼跌宕不主故常有邯鄲生天人之歎丙戌後官京師一變而高華尚聲調然梨花楓葉諸篇風

致不減青邱海叟使楚一集尤爲藝林所貴重

節錄漁洋

文略

公儀表外明風神內照早通二氏之學靜默寡言戊午識公於鐵鶴庵侍坐受教得聞公之論詩也曰詩之合者於宋得嚴滄浪明得徐昌穀王元美昌穀深造然所自爲不愧其言者十可五六焉元美可三四耳夫格律嚴則境地狹擬議盛則性情薄作者病之至於狂放背馳又不足道矣或者雌黃異調訕諫先哲是未履門闥而歷數曲室之藏也陶謫不必爲潘陸李杜不必爲王駱君子泯其同而愼其異可矣公

之論詩如此

節錄田雯
古惟堂集

賈崧按清正廉訪分守江左日嘗寓書漁洋論詩
之得失漁洋詩云風塵樵悴趙黃門嶺表遷移役
夢魂昨見端州書一紙說詩真欲到河源

陸元輔字翼王號菊隱江南嘉定人布衣著有十三經
注疏類鈔續經籍攷禮記集說補正衛道編菊隱集

陸元輔嘉定人少師黃淳耀以敦篤之姿精微之學
稱之自早年以存誠主敬自勵至老不倦其學博極
羣書而要歸於六經士大夫相語往往稱陸先生不
舉其字也康熙十七年有以博學鴻詞薦者元輔雅

不欲違素志以不入格罷歸所著有十三經注疏類

鈔續經籍考

江南通志

周肇贈陸翼王詩君是左徒門下士揭來相對哭途窮遺孤袁粲纍愁日亡命王成賃保中書館三餘淹夜雨客顏一瘦怯秋風結交世上黃金滿四海何曾識此公翼王爲黃陶庵高弟當有保全遺孤故事專及之

國朝詩別裁集注

瀛按先生入試之日夢黃陶庵先生手書碧血二字以示遂不終卷徐東海尚書贈句云早年講舍依黃憲壯歲生徒似李膺蓋傷之也先生篤信好

學矻矻著書東南耆舊並推碩果云

賈崧按先生先世本王氏曾祖松撫於陸遂冒其
姓先生爲明諸生後棄去應試時年六十三至康
熙三十年卒年七十六題旌云清徵君前文學陸
菊隱先生與先曾祖交善嘗授經吾家張樸村撰
先生墓志云翼王往往徧借異書手自繕錄至脫
腕不倦積至千卷束修大半以購書籍

王念真一名含真字樸齋號寅若山西猗氏人康熙丙
辰進士

王念真猗氏縣人幼穎悟工文章嘗年餽於庠中乙

卯鄉試丙辰進士戊午舉博學鴻詞戊辰赴銓疾作卒念真學有根柢與人言率本諸經好義樂施知舊多賴以舉火嘗建尊經閣聚邑文士月試之如舉場例猗氏文學滋興當舉博學鴻詞時以父巖徵齒高不欲去父趣之不得已就試試畢卽日馳歸父卒鷄骨苦居見者胥歎其孝歿之日邑人無識不識胥爲

流涕

山西
省志

任辰旦字千之號待庵浙江蕭山人康熙丁未進士以外氏籍榜名韓燦後復姓改今名除江南上海縣知縣行取擢工科給事中轉兵科改大理寺丞著有介和堂

集二卷

任辰旦以韓燦姓名成進士授上海令上海租賦盈四十萬而漕復半之地產木棉不給漕粟辰旦調以意不緩不迫民困獲甦黃龍浦屢圯久不成辰旦命匠範石於陸第其甲乙牝牡之復募善泗者暗埋石而累塚其中且壘石作埂使水無橫溢而又善下至今利賴焉薦舉博學鴻詞擢工科給事中轉兵科掌印甲子充湖廣主考旋改大理寺丞所著有介和堂集

紹興府志

任君辰旦字待庵順治丁酉以第四人舉於鄉以外

氏籍名韓燦成進士復姓改今名授上海令以廉稱
身衣木棉履䟽履棧馬不食豆日買水二百錢屋櫺
不葺臺使嘉其廉將薦之會以鴻博

召罷歸復故官臺使乃特破例薦行取以科員用補
給事中主試湖廣陞大理寺丞君性孝友而峻於遇
物少以文名自通籍後卽殫思吏治所著詩文有介

和堂各一卷

節錄西
河文集

君莅政之暇集縉紳以造多士鼓吹騷雅激揚風流
弦歌之風比戶而是往者握手京華開尊道古出詩
文法刻見示上薄漢魏下掩三唐憂金石之聲發雲

霞之氣大雅未墜正始猶存所以起頽風而式後學

者於是乎在

沈荃
筆記

陸次雲字雲士浙江錢塘人拔貢生授河南郟縣知縣
丁憂起復補江南江陰縣知縣著有尚論持平二卷析
疑待正二卷事文標異一卷八紘譯史四卷紀餘四卷
八紘荒史一卷尚谿織志三卷志餘一卷澄江集十卷
皇清詩選六十卷玉山詞六卷北墅緒言五卷湖壖雜
記一卷

是書蓋續田藝衡西湖志餘而作如慶忌塔夾城之
類亦頗有考辨而近於小說者十之七八蓋藝衡之

書體例亦如是也

節錄四庫書目
湖壩雜記提要

是集皆古今體詩蓋其官江陰時所作故以澄江爲
名集中五古短篇及宮詞之類頗能自出新裁而蹊
徑不免於太狹尤侗序稱次雲尚有玉山集附此以
傳此本無之殆偶佚歟

節錄四庫書目
澄江集提要

陸次雲字雲士錢塘人康熙己未以鴻博徵報罷尋
作吏郟縣丁父憂去之日民走送累百里起復知江

陰縣詩極排奐獨出新意

杭州府志

錢塘陸子雲士貌專而容寂歲丁戊間以鴻博徵尋
罷去作吏郟縣又以憂去官薄遊沅湘洞庭間盛作

爲歌詩古文辭以紀其歷覽見聞之跡余讀之未嘗
不歎其才之兼也陸子詩極排奐獨出新意寧使人
疑怪終不爲禿屑俗下之調而其爲文騷則歌辨之
遺記序則曾王之緒至其採風土之異可以備輶軒
述山川之形可以登

皇覽非僅文士筆墨祇以爲性靈陶寫之物已也以
余所聞邾邾之政未浹歲百廢振興綱舉而目張去
之日邾邾之民罷市走送累百里是其爲政非有過
人者而能致是乎以文章如彼以政事又如此信乎
陸子之才兼也

節錄漁
洋文畧

瀛按北墅緒言徐東海尚書序之稱其詩長於五古其它文章亦有原委自成一家言緒言則以文爲戲如王子淵僮約揚子雲逐貧之類滑稽諷刺亦大雅之所取也先生官江陰日湯西厓先生尚未遇嘗往從之政理之暇互相唱酬極一時風流韻事

許自俊字子位號韞齋江南嘉定人康熙庚戌進士除山西聞喜縣知縣著有潛壺韞齋等集左氏提綱三通要錄歷遊山水記司計全書了公宗旨等書

子位知聞喜縣時攜一子一僕食脫粟飯佐以青菜

往來郡省策蹇而行輿上官詩綾扇外無他物用法
甚平民多勸輸雅工詩文名勝處題咏殆遍尋以乞
休歸行李蕭然當時稱爲清白吏

李富孫鶴
徵錄續補

魏學渠字子存號青城浙江嘉善人順治戊子舉人除
成都府推官遷刑部主事出爲湖廣提學道僉事擢江
西湖西道參議

魏學渠字子存嘉善人順治戊子舉人授成都府推
官時蜀中初定招撫流亡綏輯兵民事事得宜定嘉
眉邛四州賦額公私稱便擢刑部主事改定例過嚴
者數十條陞湖廣學道江西湖西道務從寬簡屬令

有苛政劾去之與王阮亭田紫來相倡和生平輕財
好施桐城錢澄之與學渠交最深感德不忘名其樓

曰懷青

嘉興府志

青城少負雋才爲柳州八子之一

葛雄圖鶴徵錄叅輯

儲方慶字廣期號遜庵江南宜興人康熙丙午解元丁
未進士除山西清源縣知縣著有遜庵文集

康熙三年

詔廢八股用策論丙午君以策論舉省試第一明年
成進士是時君所爲文章重天下對策纒纏四千餘
言伉直明切論者方之董膠西鼂家令他文率雅健

長於議論出令清源會三匪用兵清源以小邑當孔
道軍興旁午民重困君舉債補苴不加派閭左一錢
以鴻詞徵入京謝客蕭寺足不及公卿門報罷投劾
歸里遂齟齬以終節錄邵長蘅青門集

瀛校宜興儲氏門才最盛大抵以八股擢名而先
生獨以策論領鄉薦第一與先生同輩行者集廢
字雪持能文章迎陵序其集善慶與先生同科進
士官井陘令子右文舉人大文康熙辛丑會元入
翰林郁文雄文皆辛丑進士在文已丑進士官編
修大文兄弟並工於文而雄文尤工詩善慶孫麟

趾官至宗人府府丞

賈崧按先生令清源山水數漲爲城害歲修白石
堰禦之復以餽運不給因停修堰役步禱白龍神
廟明年春山水改道而南去城十里喜曰可保數
十年無患矣乃移白龍廟以鎮之上官爭爲引重
周之道一名起莘浙江蕭山人廩貢生

顧均按曝書亭集有王尚書招同陸元輔鄧漢儀
毛奇齡陳維崧周之道李良年諸徵士讌集怡園
五言律詩六首

鄧林梓一名琳梓字肯堂號玉山江南常熟人布衣著

有玉山詩文集

鄧林梓字肯堂一字玉山明孝廉文度先生之曾孫
爲諸生名籍甚尋以糧累註誤黜去居久之

朝廷有鴻博之選君被薦入都卒君生而穎異年十
三作空谷詩見賞於松圓詩老人呼之爲鄧空谷旣
除諸生籍益肆力於詩歌唱酬皆一時勝侶古文亦
有筆嘗爲瞿桂作年譜紀事本末纖悉不譌錢宗伯
極稱之

古虞詩
苑小傳

賈崧按肯堂本蔡氏其高祖穀幼育於外祖鄧洪
家遂從其氏洪家多藏書穀盡讀之邑令楊子器

異之遺以俸錢又罰巨室犯事者葺其廬咸譖不
受正德丙子舉於鄉會母病遂不出築室母寢旁
以圖史自娛撫按高其行卽其家建尚志坊以表
之